

Tiit Maktumne taat Pool siiriji do Tiit Pile ka kaawor

Na Pool kat siirit maktumne-an do Tiit. Na siirit do wiktin taat na goiyi daŋaayne. Min nu bal obiŋ misa Pool daŋaayne, Tiit gaayiig inj riy ta gaare Kabarre ta Gala. Kar ba aaro, Pool gaarji riy do kič ka Kreet. Kič ḥaar-ak goy datik amiydi. Riy ta Tiit-at a naa gaayiŋ kretiyenna nu leeyiŋ gamin ku Eglizdi inj botilco. Pool taayiig Tiit a maman na dobe agindaw ku Eglizdi. Na diyiji oki a naa taaye gee maman nuu goye goye kaak Buŋ rakiyo, wala nuur kuuk zače, wala dūbal in gemsa, wala berrina.

Ooy ta awalle

¹ Nun Pool, berre ka Buŋdi kat siirit maktumne-anta. Nun *paliine ka Iisa Masi a naa iyin nuur kuuk Buŋ dobtu-ak a nuu obin imaanco bombo ho nuu ibiniŋ samaane ɓilde kaak Iisa ɓildiigu. ² Hiyya, nuu diye do kayco kadar nu asa goye inj ḥaar tak-tak. Asaan awalle, min Buŋ kilgiyiit duniine, na kaawco ko do geenji a nu asa gase goye ka gaasdo. Hadi ginte iban kadar Buŋ, ḥaar raaddo tak-tak. ³ Buŋ dobtu wiktine a naa gaarin kaawoy do geemir inj riyor taat nu giniyo. Ta taar-an ko riy ta jile geemir taat Buŋ kaawiidu a naa gine ho na beriiduut do pisindu.

⁴ Kinj Tiit, nu iciŋciŋ ar ki roŋdu ka meendu, asaan seerte gi aamin do Iisa Masi. Nu indaajinj

Tatte Buŋ in Gay Jilinte Iisa Masi, ɳuuŋ barkiye in ɳuuŋ iye aapiye do gelbineŋ.

Doe ka agindaw ku Eglizdi

⁵ Wiktin taat nu uctu min kid ka Kreet, nu indincin a kii dake, kii gaasin riy taat dak annere. Riy taat nu rakiy ki gine gay, kii lee agindaw ku *Eglizdi do ay geeger ka Kreet. Wiktin taat nu goy in kinke nu taayiñciŋ aman : ⁶ Tatkaw ka Eglizdi, ɳaa goye godom. Naa obe daatik rakki di. Kooginay sa yaa aamine in Iisa Masi. ɳuur sa yaa goye godom ho ɳuu karmiyin aginiyco. ⁷ Buŋ, ɳaar berjit riyoy do tatkaw ka Eglizdi. Do taar-an ko, ay tatkaw ka Eglizdi yaa gine gem sellen. Naa ginenna gem kaak a tanji di yaa tee ho ɳaa dapiñenno munjam. Naa sakriyenna ho ɳa koocenno eenji. Na ginenna gem kaak diya gelbinez do maan ka gemor. ⁸ Illa tatkaw-ak yaa gine gem kaak oba gee gerci ho ɳaa gine gem kaak el gine riy taat sellen. Naa ginenna gem ka hallel. Na eerro gee. Naa nigenno ho ɳa gedirji do ziy. ⁹ Amaanney ta tař taat gee gaariiji yaa goye bombo. Ansi-ak, ɳaa gedire gaaye eenji in ɓilde ka seene ho ɳaaco gedire do gee kuuk meelaw.

¹⁰ Nu diyiji ansi-ak, asaan gee dakina goy ku pooca ice kaaw ta agindaw ku Eglizdi. Ka seener gay, gee ɳuur-ak goy datik ta ɳuur kuuk diya aman : « Gee kuuk amine, okinco yaa dukumen ja selño. » Gee ɳuur-ak ɓilda eenco in kaawin kuuk do botilcodo a ɳuu jagiñ min botol ta tař. ¹¹ Kar kin Tiit gay, todco ɳuu ɓildenno gee. Asaan ya ɳu ɓilda gee in kaawin kuuk do botilcodo-ak, ɳu niga geray ku geemir. ɳu ɓildiy gee pa-ak, asaan ɳu rakiy gase

minninco gurus. ¹² Taaye, gin nabiince rakki min gee ku Kreet kaak kaaw aman : « Ō Gee ku Kreet, ηuur el raade, ηu ar kumin ku yeero kuuk motilay, ηu zegilay ho teenco gay teenno. » ¹³ Kaaw ta nabiincer-an do botilti. Hadi ya kaawoy-at kat goy di do botilti gay, kinj, zeedu, leesco dakina asaan ηuu aamine do kaawte. ¹⁴ Pey ηu cokiyenno kaawin ku *Yuudinna imiltu min do kayco ho ηu aadisydo pey aadanna ku gee kuuk poocit kaaw ta seener. ¹⁵ Do gee kuuk bal nige do unji ka Bunji, ginno maan kaak yaa niginco min kara. Kar do gee kuuk nigaw ho amnaydo do Iisa gay, min gamin kuuk ηu giniyo, ginno maan kaak selleñ. Kun kawta, ηu pakira ko do gamin ku jookum di ho ηu eergigdo gamin kuuk selleñ in gamin kuuk jookumo. ¹⁶ Gee kuuk amil min do botildi-ak, ηuur diya a ηu ibingig Buñ, kar goyinco gay gaarro kadar ηu ibingig Buñ ka seener. Ō Gee yilaagu, ηu karmaydo Buñ ho ηu gedarro gine maan rakki kaak selleñ oki.

2

Bilde kaak ta6

¹ Kar kinj Tiit gay, gaarco do geemir bilde kaak ta6. ² Kaawco do jaminnar a ηuu gedire do ziñkico, ηuu goye godom ho ηuu goye goye kaak gee yaa karmiyinco. Ηuu obin pey imaanco bombo, ηuu elguwe ziñkico ho ηuu icguwe subirraw. ³ In taaran ko, kiico diye do ajusinna a ηuu goye goye kaak Buñ rakiyo do gamin okinco kuuk ηu giniyo. Diyco a ηuu osenno eeñco ho ηuu peye min see kaak aale. Diyco a ηuu taaye eeñco in taaye kaak samaane. ⁴ In taar-an kat, ηuu gaare do eeñco daadku cewey

maman ɳuu goye. Nuuco gaare maman ɳuu elin midiyo co in kooginco,⁵ maman ɳuu goye godom ho ɳuu taleŋ ko midiyo co di. Maman ɳuu obe geriyco, ɳuu gine *cawar ho ɳuu karmiye midiyo co. Paa kat, waan nigliydo biy in kaaw ta Buŋdi.

⁶ Do dūbal in gemsa oki, kondirco do leesindi a ɳuu goye goye kaak Buŋ rakiyo ⁷ do gamin okiŋco kuuk ɳu giniyo. Kiŋ Tiit sa gin taat selleŋ asaan dūbal in gemsa-an yaa ice botiliŋ. Ya ki ɓilda gee sa, ɓildig in ɓilde kaak in botiliy, paa kat, ɳuuŋ karmiye.⁸ Illa kaawoŋ yaa ase do werti di. Waan gediraado yaaŋ meeple. Ansi-ak, sokan yaa deen adinte ɳu gediriydo gase maan kaak jookumo min lote.

⁹ Do berrinar, diyco a ɳuu ginin riyco taat geençco diyiico a ɳuu gine. Ansi-ak, yaaco aawe gala. Nuu meelinçcodo geençco. ¹⁰ Nuu kokiniŋcodo. Illa ɳuu gine taat geençco yaa oziliŋco. Ampa-ak, in goyiŋco, gee yaa karmiyin kaaw ta Buŋdi, Gay Jilinte.

¹¹ Asaan Buŋ, ɳaar gaarit barkiney taat ɳaa jiliŋ gee okiŋco. ¹² Taar ko gaaraate maman gii jipte goyinte, gii poocin gamin kuuk goy do duniiner. Ansii kat, gii ibine do goyinte ho gii goye goye kaak Buŋ rakiyo ho selleŋ do unji ka Buŋdi. ¹³ In taaran ko, gii diye do gelbinte do yiriy ta tař taat gi eriyo. Yiriy taar-at kat, Iisa Masi kaak Buŋte ho Gay Jilinte yaa yeepe in *darjiney. ¹⁴ Do bi kanten ko, Iisa Masi rastu ziy, ɳu deeyiiga asaan ɳaate jilinte min do gamin kuuk samaanno ho ɳaate acin zunubinnite. Ansi-ak, gii gine geenji, gii zeede gine taat samaane.

15 An ko kaaw taat kiico kaawe ij zeede. Kiico leese ho kii gaayinco. Dak rasenno gee yaan gine ar maan ka maala.

3

Goye ka gee ku Buñdi

1 Kin Tiit, deelcot kaaw do gee ku Buñdi a ñuu karmiyin agindaw ku darrer yoo *gaanuunco. Deelco a ñuu gine taat sellen do eeñco. **2** Diyco a ñuu diyenno kaaw do eenco, illa ñuu gine sellen benannico. Ñuu goye dalullay ij gee okinco. **3** Asaan awalle ginte oki gee kuuk olivyay, gi newsiji kop do Buñdi, gi jag min botol taat samaane. Gi gin berrin ku gamin okinco ar ele ka maanni ho gamin kuuk bera galal. Gi el nigen di. Gi hasuudinay. Gi gina taat gi rakiy di. Gi ello ziñkite. **4** Kar gay, Buñ kaak jilinte gaarte sellinjkuwyij ij elinji lote okinte. **5** Na jilinte min do zunuubinnar asaan ña tal aminduwte. Na balte jilinte asaan gi gin taat ij botilti. Buñ jilinte ij Ruwwiney taat ña beriite. Ta acten zunuubinnite. Gi gintu gee kuuk marbinto ho gi ictu goye kaak marbinto. **6** Buñ miintenj gelbinte ij Ruwwin ta Iisa Masi kaak Gay Jilinte beriite. **7** ANSI-ak, Buñ ij elinji, ña gininte gi goiyij ij botol do unji asaan gii gine kooginay kuuk yaa gase goye ka gaasdo kaak gi eriyo. **8** Ka seener, kaaw-an do botilti.

Ansii ko, nu rakiy a kiti wakile do kaaw-anta. Asaan ñuur kuuk aamin do Buñdi yaa zeede gine sellen. Kaaw taar-an yaa gaayin gee okinco. **9** Kar gay, kaway min gamin ku tambaar, kaway min gee kuuk el giduwa ho kuuk el meelo do bi ka

gaanuundi. Asaan gamin ar ɳuur-aŋ bal gine pay-dinco. Nu gaaydo gee. ¹⁰ Ya goy gem kaak el eere gee, karumga, kar kiji deele pey. Ya ɳa icdo gay, kiji newse kopo. ¹¹ Kiŋ iban kadar gem kaak gina ansi-ak, ɳaar jag min do botol taat samaane. Ya ɳa 6aa ansi di-ak, ɳa tara ziy ka meenji.

Ooy ta ba aaro

¹² Nu rakaan̄ ɳaame gem rakki kaak 6aaŋ make : Artemaas wał̄ Tisik. Ya ɳa ote, uc parak ki asiin gasindu kodok do geeger ka Nikopoliis asaan nun ic niyine, nu raka gaasin ribba ede. ¹³ Baan̄, gaayig Zenaas gay dukume seriiner, inj Apoloos. Obco wero do martuwco. Nu rakaado maan yaaco arme. ¹⁴ Do sijtite sa, illa ɳuu ibine kadar ɳuu gaaye gee kuuk ya gamin armaaco. Ansii kat, goye ka gee ku Buŋdi uciydo maala.

¹⁵ Siŋta okiŋco kuuk goy anne inj nunu ooyiŋ dakina. Kiŋ sa, ni diyaajin̄ : ooyco do sijtite kuuk elgiite kuuk goy annere.

Okiŋko, Buŋ yaako barkiyiŋko. Nu ooyko dakina.

**Jamaw ta Marbinto: Kabarre ta Gala do bi ka
Iisa Masi in danla**

New Testament in Dangaléat (CD:daa:Dangaléat)

copyright © 2012 Wycliffe Bible Translators, Inc.

Language: Dangaléat

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dangaléat

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-01

PDF generated using Haiola and XeLaTeX on 11 Nov 2022 from source files
dated 29 Jan 2022
ab97a9dd-e7e6-53b0-a477-f2859d09bc84